

全唐诗卷六百三十

卷 630_1

【水国诗（以下杂体诗）】陆龟蒙

水国不堪旱，斯民生甚微。
直至葭菼少，敢言鱼蟹肥。
我到荒村无食啖，对案又非梁谢览。
况是干苗结子疏，归时只得藜羹糝。

卷 630_2

【井上桐】陆龟蒙

美人伤别离，汲井长待晓。
愁因辘轳转，惊起双栖鸟。
独立傍银床，碧桐风袅袅。

卷 630_3

【门前路】陆龟蒙

门前向城路，一直复一曲。
曲去日中还，直行日暮宿。
何必日中还，曲途荆棘间。

卷 630_4

【彼农二章】陆龟蒙

世路浇险，淳风荡除。
彼农家流，犹存厥初。
藁焉而席，茨焉而居。
首乱如葆，形枯若踰。
大耋既鲐，童子未 cE。
以负以载，悉薶悉鉏，我慕圣道，我耽古书。
小倦于学，时游汝庐。
有饭一盛，莫盐莫蔬。
有纁一缁，不襟不祛。
所谓饥寒，汝何道欤。
禹贡厥田，上下各异。
善人为邦，民受其赐。
去年西成，野有遗穗。
今夏南亩，旱气赤地。
遭其丰凶，概敛无二。
退输弗供，进诉弗视。
号于旻天，以血为泪。
孟子有言，王无罪岁。
诗之穷辞，以嫉悍吏。



卷 630_5

【奉酬袭美苦雨见寄】陆龟蒙

松篁交加午阴黑，别是江南烟霭国。
顽云猛雨更相欺，声似虢号色如墨。
茅茨裊烂檐生衣，夜夜化为萤火飞。
萤飞渐多屋渐薄，一注愁霖当面落。
愁霖愁霖尔何错，灭顶于余奚所作。
既不能赋似陈思王，又不能诗似谢康乐。
昔年尝过杜子美，亦得高歌破印纸。
惯曾掀搅大笔多，为我才情也如此。
高揖愁霖词未已，披文忽自皮夫子。
哀弦怨柱合为吟，cL我穷栖蓬藿里。
初悲湿翼何由起，末欲笺天叩天耳。
其如玉女正投壶，笑电霏霏作天喜。
我本曾无一棱田，平生啸傲空渔船。
有时赤脚弄明月，踏破五湖光底天。
去岁王师东下急，输兵粟尽民相泣。
伊予不战不耕人，敢怨烝黎无糝粒。
不然受性圆如规，千姿万态分毫厘。
唾壶虎子尽能执，舐痔折枝无所辞。
有头强方心强直，撑拄颓风不量力。
自爱垂名野史中，宁论抱困荒城侧。
唯君浩叹非庸人，分衣辍饮来相亲。
横眠木榻忘华荐，对食露葵轻八珍。
欲穷玄，风未白。
欲怀仙，鲸尚隔。
不如驱入醉乡中，只恐醉乡田地窄。

卷 630_6

【夏日闲居作四声诗寄袭美□平声】陆龟蒙

荒池菰蒲深，闲阶莓苔平。
江边松篁多，人家帘栊清。
为书凌遗编，调弦夸新声。
求欢虽殊途，探幽聊怡情。

卷 630_7

【夏日闲居作四声诗寄袭美□平上声】陆龟蒙

朝烟涵楼台，晚雨染岛屿。
渔童惊狂歌，艇子喜野语。
山容堪停杯，柳影好隐暑。
年华如飞鸿，斗酒幸且举。

卷 630_8

【夏日闲居作四声诗寄袭美□平去声】陆龟蒙

新开窗犹偏，自种蕙未遍。

书签风摇闻，钓榭雾破见。
耕耘闲之资，啸咏性最便。
希夷全天真，诤要问贵贱。

卷 630_9

【夏日闲居作四声诗寄裘美□平入声】陆龟蒙

端居愁无涯，一夕发欲白。
因为鸾章吟，忽忆鹤骨客。
手披丹台文，脚著赤玉舄。
如蒙清音酬，若渴吸月液。

卷 630_10

【奉酬裘美苦雨四声重寄三十二句□平声】陆龟蒙

幽栖眠疏窗，豪居凭高楼。
浮沤惊跳丸，寒声思重裘。
床前垂文竿，巢边登轻舟。
虽无东皋田，还生鱼乎忧。

卷 630_11

【奉酬裘美苦雨四声重寄三十二句□平上声】陆龟蒙

层云愁天低，久雨倚槛冷。
丝禽藏荷香，锦鲤绕岛影。
心将时人乖，道与隐者静。
桐阴无深泉，所以逞短绠。

卷 630_12

【奉酬裘美苦雨四声重寄三十二句□平去声】陆龟蒙

乌蟾俱沈光，昼夜恨暗度。
何当乘云螭，面见上帝诉。
臣言阴云欺，诏用利剑付。
回车诛群奸，自散万籁怒。

卷 630_13

【奉酬裘美苦雨四声重寄三十二句□平入声】陆龟蒙

危檐仍空阶，十日滴不歇。
青莎看成狂，白菊即欲没。
吴王荒金尊，越妾挟玉瑟。
当时虽愁霖，亦若惜落月。

卷 630_14

【晓起即事因成回文寄裘美】陆龟蒙

平波落月吟闲景，暗幌浮烟思起人。
清露晓垂花谢半，远风微动蕙抽新。
城荒上处樵童小，石薜分来宿鹭驯。

晴寺野寻同去好，古碑苔字细书匀。

卷 630_15

【回文】陆龟蒙

静烟临碧树，残雪背晴楼。
冷天侵极戍，寒月对行舟。

卷 630_16

【叠韵山中吟】陆龟蒙

琼英轻明生，石脉滴沥碧。
玄铅仙偏怜，白帟客亦惜。

卷 630_17

【双声溪上思】陆龟蒙

溪空唯容云，木密不隕雨。
迎渔隐映间，安问讴雅橹。

卷 630_18

【叠韵吴宫词二首】陆龟蒙

肤愉吴都姝，眷恋便殿宴。
逡巡新春人，转面见战箭。
红栊通东风，翠珥醉易坠。
平明兵盈城，弃置遂至地。

卷 630_19

【和胥口即事】陆龟蒙

雨后山容若动，天寒树色如消。
目送回汀隐隐，心随挂鹿摇摇白蒋知秋露裊，青枫欲暮烟饶。
莫问吴趋行乐，酒旗竿倚河桥。
把钓丝随浪远，采莲衣染香浓。
绿倒红飘欲尽，风斜雨细相逢。
断岸沈渔 uNuO，邻村送客 fsfp。
即是清霜剖野，乘闲莫厌来重。



卷 630_20

【齐梁怨别】陆龟蒙

寥寥缺月看将落，檐外霜华染罗幕。
不知兰棹到何山，应倚相思树边泊。

卷 630_21

【闲居杂题五首（以题十五字离合）□鸣蛩早】陆龟蒙

闲来倚杖柴门口，鸟下深枝啄晚虫。
周步一池销半日，十年听此鬓如蓬。

卷 630_22

【闲居杂题五首□野态真】陆龟蒙

君如有意耽田里，予亦无机向艺能。
心迹所便唯是直，人间闻道最先憎。

卷 630_23

【闲居杂题五首□松间斟】陆龟蒙

子山园静怜幽木，公干词清咏荜门。
月上风微萧洒甚，斗醪何惜置盈尊。

卷 630_24

【闲居杂题五首□饮岩泉】陆龟蒙

已甘茅洞三君食，欠买桐江一朵山。
严子濂高秋浪白，水禽飞尽钓舟还。

卷 630_25

【闲居杂题五首□当轩鹤】陆龟蒙

自笑与人乖好尚，田家山客共柴车。
干时未似栖庐雀，鸟道闲携相尔书。

卷 630_26

【药名离合夏日即事三首】陆龟蒙

乘屐著来幽砌滑，石罍煎得远泉甘。
草堂只待新秋景，天色微凉酒半酣。
避暑最须从朴野，葛巾筠席更相当。
归来又好乘凉钓，藤蔓阴阴著雨香。
窗外晓帘还自卷，柏烟兰露思晴空。
青箱有意终须续，断简遗编一半通。

卷 630_27

【和袭美怀锡山药名离合二首】陆龟蒙

鹤伴前溪栽白杏，人来阴洞写枯松。
萝深境静日欲落，石上未眠闻远钟。
佳句成来谁不伏，神丹偷去亦须防。
风前莫怪携诗藁，本是吴吟荡桨郎。

卷 630_28

【和袭美怀鹿门县名离合二首】陆龟蒙

云容覆枕无非白，水色侵矶直是蓝。
田种紫芝餐可寿，春来何事恋江南。
竹溪深处猿同宿，松阁秋来客共登。
封径古苔侵石鹿，城中谁解访山僧。

卷 630_29

【寒日古人名】陆龟蒙

初寒朗咏裴回立，欲谢玄关早晚开。
昨日登楼望江色，鱼梁鸿雁几多来。

卷 630_30

【句】陆龟蒙

几点社翁雨，一番花信风。

（见《提要录》）

水鸟歌妇女，衣襟便佞舌。

（以下并见《海录碎事》）

溪山自是清凉国，松竹合封萧洒侯。

山上花明水上曛，一桡青翰破霞文。

白帝霜舆欲御秋。

但说漱流并枕石，不辞蝉腹与龟肠。

（以下见《侯鲭录》）

头方不会王门事，尘土空缁白苧衣。

秋来懒上向吴亭。

（见《方輿胜览》）

